

L'BLEÛWE COLOUTE.

On n'polève nén vîre dins l' imaudje, dès waches spitant lès bouchnisses, on riglatichant ptit richot. Avou s'flauwe clêr bleuwe, l' cîr rindève l' portrê d' paysâdje fwârt plêjant èt atirant. Dins l'fayé dauré câde di bwès, deûs dwèts pa-dvant lèye, on vêre tinéve l' pinturêye twèle à iute dès pouchêres.

Dj'î a avizé l' bleuwe coloute. Dèl grocheû d'on poce, èle s' avéve aclapé dins l' dwète cwane èt s' alondjî dsus l' bas costé. L' tièsse rècrèstêye, èle dimèréve à djoke. Vos arîz dit iène di cès colorêyes rôyes po todi èdjalêyes dins cès boles di vêre k'à tanawète on vwèt co amon dès vîyès djins, au mitan d'ène blanke dintèle, dsus l' drèsse obén l' djivau dèl tchiminêye. Kwè fiève-t-èle plonkêye là ? L' alin.ne di s'doviète rôzète gueûye èbuwéve li d-drî do carau. Djî riwêtéve s' pwintuwe tièsse. S'linwe, tène foutche, balzinéve come on fistu au vént d' bîje èt toker conte li glace. Djî m'a mètu à triyaner d' peû. A costé d'mi, m'popa, li, n' avéve nén l'air di trover ça contrîre. Sès mwins dins sès potches, i stindève li col èt avancî s' baube.

Dj'a di : "Djî n'in.me nén c' bièsse-là. I vos faurève li taper djus.

- Èle èst tot bleuwe, a rèspôndu m' popa sins vîre do mau là-ddins.
- V'la co bèn ! Lès èfants vont volu à tote fwace î mète li dwèt !

M' popa avéve sakants pistolèts. S' èstéve on fén tireû. Djî l'a ènondé à nd' aler è prinde yink, aspoyî l' bûzète dsus l' carau, à l' tièsse dèl coloute, èt l' tuwer sins pont d' riske èt domâdje.

Ossant sès spales, dins l' idêye di m' continter, il a rèchu foû.

Dj'a dimèré à place aurdant à l' ouye l' bièsse dins s' gayole d' machurêye twèle èt vêre.

L' uch s'a douvièt d' on randon. M' popa rivnéve.

Ké moxhe l' avéve-t-i agnî ? Il a bwêrlé : "Bachoz-vos !" èt sins ratinde s' mète à tirer au dzeu di m'tièsse dins l' portrait. Foû d'li, one ârme dins chakène di

sès mwins, lès côps d' feu pètîne à r'laye. L' fumère èt l' odeûr dèl poûde s'sont spaurdu èt rimpli l' tchambe. Djî m'avéve ascropu conte li meur, cauzu à kat pates pa-dzo l' câde ki m' popa satchéve dissu. Lès bales volîne èt si stichî à l' astchèyance dins lès meûbes, l' plantchî do la-wôt, pa tos lès costés. A chake côp djî mankéve di moru. Ça m' èradjéve dèl voye tirer d' ossi lon, si radimint, à maulvau, sins awè pris sogne di s' raprotchî po tuwer l' coloûte di tot près. Ça n' aréve nén stî malauji a fé ! Tot cès spiyâdjès po pont rén ! C'è-st-adon k' astoké l' long do meur dj'a sintu î rider ène sakwè d' pèsant tot sople èt vinu m' flayî l' mwin.

S'èstéve trop taurd, ratèniye l' bleuwe coloute s'a faufile èt s'spiède dins l' craye inte li meur èt l' plantchî.

(Dsus l' dos di m'mwin, ène mârke, bizâremint blanke, dispû adon.)

M' popa a tapé sès inutiles pistolèts à tête èt, dismètu, dizèspèrer, s' mète à braîre.

(A l' après "Dèl cauve aus crapauds" da Djèrald Berrot – Tomas Owen – ki vént d' moru à 91 ans.)



(Dins ène reuwe di Durbuy)

On comache todi...